

A Renzo Rosa
SUPPLICA DE UN'AMIGA IMMENTRIGADA

In d'una domo in oros de Rioro,
isprufundada suta terra metros,
bi devet aer pantamas e ispetros
chi faghent sos comodossoro.
Su mere est a dolores de coro
ca intendet boghes e rumores tetros
da cando passat oras a discuter
arrogantande cun d'unu computer.

Da su chizone de domo prus bugiosu
si pesat una oghe lastimosa:
“Puite m'as fattu, Renzo, custa cosa,
puite, ingratu, m'as postu a reposu?
Finas a deris nde fusti orgogliosu
e mi tenisti cumpanza amorosa.
Notes intreas passamis affaca
senza frenu, faghinde tichi taca.

Ponimis tantos versos in iscrittu...!
Mancari calchi tastu ruinzadu
ogni tantu s'esseret incantadu,
ammenta, no t'apo mai traitu!
Ei como in su bugiu, in su fritu
che nemiga mi as abandonadu!
Como de colpu as cambiadu data
e ti ses fatu amigu de Olidata!

Ti ses circondadu de istrumentos
chi ponent in pelea s'esistenza.
Atreche progressu de s'issenzia,
sunt totu cantos penas e trummentos!
Ti che ant cancelladu sos ammentos,
e t'ant ilboidadu sa cussenzia
ca no t'ammentas prus una cantone
si no l'as posta in “salva con nome”.

Sos “sorighes” ispaltos in sa mesa
ti che sunt rosigande sos paperis;
a cantu paret oe los preferis
mancari chi ti causent tanta ispessa.
E ti dimando, Renzo, senza offesa,
los as tratados gasi fin'a deris?
Tenisti a Gigia, veru cane de cazza,
addestradu po ch'isperder sa razza!

Oe tratas de bytes e de megas,
de floppys, hard discs e ciddi
e t'as immentrigadu s'abbicci.

D'esser sardu ormai ti nde negas
e naras chi ses naschidu a Las Vegas
fizu de un'istampante e unu picci.
Si chistionas no ti cumprendo prus
ca faeddas solu arial e taim nius .

Est culpa de sa mala cumpagnia
chi ti ses reduidu a custu istadu,
dae cando a domo tua ch'est bintradu
cussu amigu malu, a bidea mia.
Non d'agatasti peus de traschia?
A mata bona ti ses afranzadu!!
In d'unu pater, un'ave e unu gloria
t'at postu for'e usu sa memoria!

Isculta a mie, leali su faeddu
a cussu malaitu fanfarrone;
in conca t'at postu unu serrone
chi ti ch'est papande su chelbeddu.
Cando l'atopas narali "nieddu,
su computer a s'incantascione!"
E torramos amigos, deo e tue.
Frimmadu: Olivetti trentadue.

Iscanu, Santuaine 2001

A Gianfranco Rosa

Perdona Rosa si so inportunu
ma ti domando torra unu favore
ca ti conosco ses unu "signore"
e mai negadu mi nd'as unu
a chilcare a un'ateru it'arore!
ischis chi no mi fido de nisciunu
anzis sun tottu prontos a isfutter
da cando apo leadu su computer.

Tue solu mi podes azuare
e ogaremiche dae su pensamentu
chi est prus mannu de su Gennargentu
e prus no mi lassat riposare,
e cando ad a esser su momentu
as a bier chi apo a ricambiare
cun calchi cosa ben'iscritta a pinna
o in casu, lardu, binu o linna.

Deris peleande in officina
cun taulas de opinu e de abete
tiad esser a ora de sas sette
cando apo intesu una parlantina
pariat beninde dae coghina
e narait "pronto quì internette"

cun d'una forte oghe poderosa
“voglio parlare al signor Rosa”.

Apenas passadu est s'ispaventu
che calo currinde a car'a bassu
abelzo sa gianna e unu passu
che ponzo a intr'e s'apostu;
ma fuit gai forte su fraccassu
chi soe restadu sen'alientu;
cree o Rosa su chi ti so nande
fun chimbe computer chistionande.

m'accosio a una tastiera
e primm'ancora de li ponner manu
intendo una oghe 'bonasera"
“ecco ch'est arrivadu s'iscrivanu”
e unu monitor de pagh'ispera
cuminzad a iscrier pianu pianu
“o maus metti un foglio bianco
che arrivato è signor Gianfranco”.

a s'allegria totugant'umpare
faghen s'ischermo de verde pisello,
pariat sa domo der grande fratello
cando lassadu a intro m'an colare
si fuin tottu etados a pare
e a centru ian postu su cestello
prenu de files, word pad e wrait
de ram, ardisk e mega bait.

Mi avvicino tottu istontonadu
tra lughes e iscarrigas elettricas,
portas seriales e pistas magneticas
b'ian a d'ogni tretu collocadu;
su logu de transistor ian prenadu
e de formulas aritmeticas,
ei sos maus si fun multiplicados
ca prus de vinti los apo contados.

Tot'in d'una m'an incoltigliadu
e non podia fagher movimentu,
cun tres terminales m'ian tentu
tot'in sos movimientos fui bloccadu;
a cand ap'intesu unu lamentu
de unu computer bezzu ruinzadu
e narait “lassadelu passare
ca solu issu mi podet salvare”.

Tando si chirrat dogni sorighittu,
sas istampantes puru faghen logu,
a cando io a color'a fogu

un Olidata b'iat morind'e frittu,
bezzu cadruddu de colore grogu,
ispozzu de forzas a ogni situ
e moribundu mi narad "ho fam
la prego mi aggiunga qualche ram".

Pranghinde tento 'e l'ispiegare
chi deo no so tecnicu 'e talentu
e finas iscrinde un argumentu
non resulto mancu a l'istampare.
Solu Gianfranco podet risultare
ca ischit fagher dogn'esperimentu
"as isbagliadu Rosa, mi dispiaghede,
ca solu issu custas cosas faghede".

"Ma si resulto a lu rintracciare
o istanotte o manzanu chitto
ateros seighi ram ti los prommitto
che resultamos a ti collocare
e t'insegnamos puru a disegnare
nuraghes e piramides d'Egitto.
Poderà ancora chi Gianfranco e deo
za ti salvamos! Assumancus creo".

De colpu intesu apo un'ispinta
e una oghe nande "faghe impresse
de lu salvare tenes interesse
ca est de su noighentos trinta »,
naraid un'istampante a tinta
cun sas testinas postas a s'imbesse
"curre chilchelu e bae a fua
ca si morit nonnu est culpa tua!"

Appenas lassadu m'an andare
sa gianna a crae apo serradu,
broccos e truncos b'apo arrambadu
e so essidu po m'imbrigare,
ca s'elettronica m'ad istufadu
e non bi cherzo mancu prus pensare,
puite ca avvita e isvita dogni die
sos perrinos partidos sun a mie.

Custa est caru Rosa s'avventura
chi m'este da pagu capitada;
ti assiguro faula non bind'ada
su chi ti nalzo est cosa sigura!
E si una die ti faghes premura
de benner a dare un'abbaidada
che leamos de inu unu pippottu
ca cussos argas s'an buffadu tottu !

A compare Gianfranco Rosa
MEZZOS MODERNOS

Si custu contu passat a s'istoria
mi tocat in iscola a lu contare:
unu compare a un'ateru compare
fut proande a li crescher sa memoria.

Che-i cuddos salmos chi finint in gloria
totu cantu at finidu po iscoppiare,
los ant depidos finas fumentare
po s'ispriu ch'ant leadu e sa timoria.

In cumbata cun software e hardiskos,
cun sos mezzos modernos peleande,
cun desktop, mouse e roba varia,

sa salute ponides in arriscos:
aberinde windows e serrande
nd'azis a leare calchi colp'e aria!

Compar'Antoni Piras - In Iscanu, su 17 de Santandria de su 2001

UNU GRANDE ESPERIMENTU

Cun su computer de una segheria
in Iscanu an fattu esperimentu,
a sa memoria l'ana dadu aumentu
e resultada nd'este una magia.

Taulas de canna e bigas de sulmentu
nd'essini a fora si li dasa "invia",
ma est durada pagu s'allegria
finas a cando no at bessiu fummentu.

Custa prova no est resultada
at nau Gianfranco no b'at de discuter
e Renzo puru "andait mezzus derisi",

e finas Gnagna da "Sa Pattada"
at nadu custu est fummu de computer
bisonzu de avisare sos Pompieris.

Gian Piero Motzo - Iscanu su 20 di Santandria 2001

A Compare Ninni, a Gian Piero Motzo, a Renzo Rosa
S'AUMENTU 'E SA MEMORIA

Za nde sun bennios sos tempos modernos
a nos boltare sa vida completa,

senza computer no b'at prus poeta
c'amos fugliadu pinnas e quadernos.

Finzas Renzo s'est creffid'adeguare
po fagher prus bella sa poetica,
ad istudiadu bene s'informatica
e unu computer s'at creffidu leare.

Unu computer de marca Olidata,
su primmu ch'an fattu a esperimentu,
si funzionat ancora est po inventu
ca tenet unu seculu de data.

Funzionat lestru che una tzontzorra,
bogande fummu e faghind'ischendittas
andat a cadrapuddos si l'impittas
che su cambaru istad anda torra.

A la narrer cumpleta cust'istoria
za lu tenet calchi difettigheddu,
ca no est tantu giustu de chelbeddu*
l'addurat paga cosa in sa memoria.

Gasi Renzo m'at nadu: "caru Rosa,
in nomen de Piludu e de Morette,
tue chi ti nd'intendes de internette
torrali sa memoria ispaziosa".

Po amore de sa sarda poesia
s'azudu no bi l'appo rifiutadu,
mancari interventu delicadu
mi provo a li curare s'amnesia.

"De ram l'innestamos otto mega"
li nalzo faghinde su sapiente,
in veridade no so cumpetente
e forrogo sos filos a sa zega.

Mi paret chi sa cura andet bene,
ca su computer pagu si lamentat,
sa memoria za paret c'aumentat,
funzionant prummones, coro e rene.

Che unu luminar'e chirurgia
torro a serrare cuddu carenadu
e naro: "Renzo, ista preparadu
ca nde l'abizo da s'anestesia!"

Cuminzad a ischendittas e fummentos
su computer appenas in funzione
e in sa memoria noa a muntone

li sun torrande chentumiz'ammentos...

Sos ammentos allegros e tristuras
de una vida longa che ispantu;
si cummovet, nde li 'enit su prantu
ammentande tantas aventuras.

Ma po cussu computer maleconzu,
tantas emozioni parent troppu,
sos transistor si faghen a unu groppu,
lampat, sonat, sind'ochid, est isconzu.

No semper sa nave andat in portu...
A boltas s'omine chi s'intendet male
andat a si curare a s'ispidale
e ch'intrat biu po nd'essire mortu!

Za est bellu ischire s'informatica
ma su poeta sardu a bidea mia
devet bolare cun sa fantasia
e iscrier cun mezzos ch'ad a pratica.

Gasi Renzo, senza narrer nudda,
nd'at torrad a bogare su tinteri
e como iscriet cantones in paberi
cun d'una pinna fatta 'e pumma 'e pudda!

Iscanu, 22 de Nadale 2001